

四庫全書

史部

欽定四庫全書

史部

大事記續編卷四十七

詳校官檢討臣朱依昊

編修臣裴謙覆勘

總校官編修臣倉聖脉

校對官助教臣胡子襄

謄錄貢生臣苗序洙

欽定四庫全書

大事記續編卷四十七

明 王禕 撰

隋高祖文皇帝開皇九年春正月乙丑朔賀若弼濟自
廣陵韓擒虎濟自橫江甲申若弼敗陳師於蔣山攻宮
城擒虎執陳主叔寶丙戌晉王廣至建康施文慶沈客
卿等皆伏誅癸巳遣巡撫陳州郡周羅暉等亦降陳亡
以陳隋本紀舉要歷
補遺王通元經修

解題曰陳自武帝霸先至後主叔寶五世凡三十三

年王凝問於王通曰元經書陳亡而具五國何也曰江東中國之舊也衣冠禮樂之所就也永嘉之後江東貴焉而卒不貴無人也齊梁陳於是乎不與其為國也及其亡也君子猶懷之故書曰晉宋齊梁陳亡具五以歸其國且言其國亡也嗚呼棄先王之禮樂以至是乎凝曰晉宋亡國久矣今具之何謂也曰晉衣冠文物之舊君子不欲其先亡宋嘗有樹晉之功有復中國之志亦不欲其先亡也故具齊梁以歸其

國也其未亡則君子奪其國焉曰中國之禮樂安在其已亡則君子予其國焉曰猶我中國之遺人也觀通之抑揚感慨其志亦可悲也已

二月丙申置鄉正里長

以本紀修

陳湘州刺史岳陽王叔慎

起兵敗死

以呂祖謙標目修

遣柱國韋洸安撫嶺外降之

以隋紀修

解題曰安撫之名始於此

平建康城於石頭城置蔣州

以呂祖謙標目修

夏四月己亥帝

幸驪山勞還師乙巳獻俘太廟賞賜將士故陳境內給

復十年餘州免租賦一年己未流孔範王瑳等於邊以
江總為上開府儀同三司陳都督魯廣達死之

以通鑑修

解題曰胡寅曰孔範等亡陳之臣也帝既知之當戮
之江南以謝三吳之人既貸其死又置諸邊刑寬而
義不類矣江總身為宰相惟以詩酒陪從邪慝蓋孔
寧儀父之徒楚子不殺仲尼所非者也乃寵以爵祿
是訓臣子敗人家國而無後憂也豈不惜哉事見通

鑑

秦王俊為揚州總管四十四州軍事

以通鑑修

壬戌詔寢兵

以呂祖謙標目修

六月吏部蘇威為右僕射閏月以荊州總管

楊素為納言

以本紀修

秋七月羣臣請封禪弗許

以本紀修

冬十

二月詔太常牛弘參定雅樂

以本紀修

隋高祖文帝開皇十年春二月庚申帝幸并州夏四

月至自并州

以本紀修

出李德林為湖州刺史

以呂祖謙標目修

五

月乙未詔軍人悉屬州縣

以本紀呂祖謙標目修

解題曰按本紀詔曰魏末喪亂寓縣瓜分役車歲動

未遑休息兵士軍人權置坊府南征北伐居處無定
家無完堵地罕苞桑恒為流寓之人竟無鄉里之號
朕甚愍之凡是軍人可悉屬州縣墾田籍帳一與民
同軍府統領宜依舊式罷山東河南及北方緣邊之
地新置軍府葉適曰按李繁家傳載蘇綽初置府兵
與此利害優苦殊不同然詔文乃當時實事蓋綽雖
創始而地狹民寡加以長征不歸故未能盡行其說
至平陳後乃修完成法爾

六月辛酉制民年五十免役收庸以本紀修秋七月癸卯楊

素為內史令以本紀修冬十一月辛卯帝幸國學以本紀修有事

於南郊本紀江南盜起遣楊素討平之以本紀及呂祖謙標目修并州

總管晉王廣為揚州總管秦王俊為并州總管以通鑑修番

禺夷反給事郎裴矩討平之高涼洗氏置幕府以通鑑及呂祖

謙標
目修

隋高祖文皇帝開皇十一年春二月丙子以臨潁令劉

曠為莒州刺史以本紀修辛巳晦日有食之以本紀修秋八月壬

申殺弟滕王瓚

以通鑑修

解題曰按列傳瓚見高祖執政羣情未一恐為家禍陰有圖高祖之計餘見大建十二年周天元帝殂解題

上柱國沛達公鄭譯卒

以紀傳修

隋高祖文皇帝開皇十二年秋七月乙巳蘇威免官爵

禮部尚書盧愷除名

以本紀及呂祖謙標目修

有事於太廟

本紀

壬申

晦日有食之

以本紀修

八月甲戌制死罪今大理覆治

以本紀通

鑑冬十二月乙酉楊素為右僕射與高頴專掌朝政

以

祖謙標目修

免右領軍大將軍賀若弼官

以呂祖謙標目修

府藏皆

滿免河東北功調減田租一年

以通鑑修

解題曰李燾曰古今之富者莫如隋而所以卒為隋禍者亦惟其富爾夫帝王之所謂富而教之者豈曰盈其倉廩則羣黎百姓徧為爾德也哉惟在布大利於天下而吾無所私焉使斯民安居樂業養生喪死而無憾相與從事於孝弟忠信之際則吾之禮樂刑政

可以四達而不悖矣高祖躬履儉約而戶口日滋此固致富之道始高祖疾山東之巧偽重謫其正長而開相糾之科以出齊民隱戶於是丁口益增而高頴復為輸籍法使豪強不能以容其奸此隋之所以富也君臣方自以為得計而不知其惡殆與賊虐者無異高祖在位雖省徭寬賦然取之者固已深而推以予之者蓋未數數然也不然何天之於隋遽泯然棄而不知耶

遣使均田

以朱熹
綱目修

隋高祖文皇帝開皇十三年春正月壬戌帝幸岐州二

月作仁壽宮三月至自岐州

以本紀及呂祖謙標目修

禁藏讖緯

以本

修紀

解題曰按列傳著作郎王邵表言符命又引民間歌

謠引圖書讖緯依約符命捃摭佛經撰皇靈感書三

十卷奏之上今宣示天下劄集諸州朝集使焚香而

讀之上益喜賞賜優洽其所今反其所好而民不從

其是之謂矣事見通鑑

秋七月戊辰晦日有食之

以本紀修

隋高祖文皇帝開皇十四年夏四月乙丑行新樂

以本

紀修

六月丁卯給公卿以下職田

以本紀及呂祖謙標目修

秋七月

乙未以蘇威為納言

以呂祖謙標目修

關中大旱帝幸洛陽

以本紀修

解題曰李燾曰古者三年耕而後有一年之儲九年

耕而後有三年之儲以三十年之通制國用則雖有

凶旱水溢民無菜色今隋之為隋僅十餘年而粟帛
之入至於倉廩府庫已無所容然而一有天災則關
中之民至於屑豆雜糠而食流離遷徙救死不暇然
則隋之所謂富者獨其倉廩府庫而餘食遺貨之在
天下者殆無幾爾為富不仁諒其然矣事見通鑑

冬閏十月甲寅詔給北齊梁陳祭祀器物

以本紀修

齊州刺

史盧賁除名

以本給通鑑修

羣臣請封禪十二月乙未帝東狩

以本紀通鑑修

隋高祖文皇帝開皇十五年春正月壬戌帝幸齊州庚

午以歲旱謝咎泰山

以本紀及稽古錄修

二月丙辰收天下兵器

以本紀修

三月乙未至自東方

以本紀修

丁亥帝幸仁壽宮

以本紀修

解題曰通鑑考異隋書北史皆曰宮成上今高顗前
視奏稱頗傷綺麗大損人丁帝不悅楊素懼即於北
門啓獨孤后曰帝王法有離宮別館今天下太平造
一宮何足損費后以此理論上上乃解今從唐書然
唐書所載不如隋史北史為得其實事見通鑑

夏六月庚寅焚相州所貢綾文布於朝堂

以朱熹綱目修

秋七

月戊寅至自仁壽宮

以本紀修

冬十月戊子以吏部尚書韋

世康為荊州總管與并楊益州為四總管

以通鑑及呂祖謙標目修

十一月辛酉帝幸溫湯乙丑還宮

以本紀修

十二月戊子勅

盜邊糧一升皆斬

以本紀修

己丑詔文武官四考受代

以本紀修

汴州刺史令狐熙考績為天下最賜帛旌之

以通鑑修

隋高祖文皇帝開皇十六年夏六月甲午制工商不得

仕進

以通鑑修

秋八月丙戌詔死罪三覆奏

以通鑑修

解題曰刑者例也成也一成而不可變故君子盡心
焉文帝初有隋國遂定新律盡除魏周苛刻以從寬
簡初今死罪大理覆治又今死罪三奏然後行刑誠
得古帝王好生惡殺之意矣然盜邊糧一升以上者
皆斬一錢以上者棄市則雖三奏而後行亦何補哉
冬十月帝幸長春宮十一月還以公主妻吐谷渾可汗
以通鑑修

隋高祖文皇帝開皇十七年春二月癸未遣太平公史

萬歲討南寧羌平之

以本紀修

帝幸仁壽宮

以通鑑修

桂州俚帥

反遣兵討平之以今狐熙為桂州總管

以本紀及呂祖謙標目修

三

月丙辰詔諸司得於律外杖屬官

以通鑑目錄修

令盜一錢以

上棄市

以通鑑及呂祖謙標目修

夏四月戊寅頒張胄玄歷

以本紀修

秋

七月桂州人反遣右武侯大將軍虞慶則討平之

以本紀修丁

亥并州總管秦王俊免

以本紀及呂祖謙標目修

以宗女公主妻突

厥突利可汗

以通鑑目錄修

九月帝至自仁壽宮

以通鑑修

冬十二

月殺虞慶則

以本紀修

隋高祖文皇帝開皇十八年春正月辛丑詔江南民船

長三大者入官

以本紀修

二月高麗寇遼西乙巳遣漢王諒

討之遇疫秋九月己丑師還

以本紀及呂祖謙標目修

解題曰隋伐高麗始於此

冬十二月置離宮於仁壽宮道上

以本紀修

南寧羌復反史

萬歲坐除名

以通鑑修

隋高祖文皇帝開皇十九年春二月遣漢王諒為元帥

三道伐突厥都藍可汗都藍與達頭可汗襲突利破之

夏四月突利來降諸軍大破突厥兵

以通鑑修

六月殺涼州

總管王卬則

以通鑑修

秋八月高潁除名

以紀傳修

九月乙丑以

太常卿牛弘為吏部尚書

以本紀修

解題曰按通典開皇七年制諸州歲貢三人工商不得入仕十八年又詔京官五品以上及總管刺史並以志行修謹清平幹濟二科舉人牛弘為吏部尚書高構為侍郎最為稱職當時尚書舉其大者侍郎銓其小者則六品以下官吏咸吏部所掌自一命以上

之官州郡無復辟署矣

自北齊以來州郡僚佐已多為吏部所授至隋一切歸省

司杜佑曰文帝素非學術盜有天下不欲權分罷州郡之辟廢鄉里之舉內外二命悉歸吏曹纔厠班列皆由執政則執政參吏部之職吏部總州郡之權罔徵體國推誠代天理物之本意是故銓綜失叙受任多濫豈有萬里封域九流叢湊論材授職仰成吏曹以俄頃之周旋定材行之優劣求其無失不亦謬歟爾後有司尊賢之道先於文華辯論之方擇於書判

所以閱佐號為倒拔徵詞同乎射覆置循資之格立
選數之制壓例示其定限平配絕其逾涯或糊名考
覈或十銓分掌苟濟其末不澄其源誠宜詳酌古今
拯勘利弊實為大政可不務乎

冬十月甲午以突利為啓民可汗處之五原遣楊素等
擊都藍可汗十二月都藍為其下所殺達頭立為步迦

可汗

以呂祖謙
標目修

隋高祖文皇帝開皇二十年夏四月壬戌突厥步迦可

汗犯塞晉王廣等擊之太平公史萬歲大破之

以本紀修

月丁丑秦王俊以憂薨廢其國

以呂祖謙標目及朱熹綱目修

晉王廣

結楊素贊帝廢立冬十月乙丑廢太子勇及其諸子為

庶人已已殺左衛大將軍元旻等素又譖殺史萬歲十

一月戊子立廣為皇太子天下地震

以本紀修

禁毀佛天尊

及神像

以朱熹綱目修

隋高祖文皇帝仁壽元年正月乙酉朔改元

以本紀修

楊素

蘇威為左右僕射

以本紀修

二月乙卯朔日有食之

以本紀修

夏

六月廢太學四門及州縣學前殿內將軍劉炫諫不聽

以呂祖謙
標目修

冬遣楊素擊突厥

以通鑑修

隋高祖文皇帝仁壽二年春三月楊素大破步迦可汗

以通鑑修

秋七月徵蜀王秀還

以列傳修

八月己巳皇后獨孤氏

崩

以本紀修

解題曰按后妃傳序開皇二年著內官之式畧依周

禮減省其數嬪三員世婦九員女御三十八員又採

漢晉舊儀置六尚六司六典初文獻皇后懷嫉妬之

心虛嬪妾之位不設二妃防其上逼自嬪以下置六十員又抑損其服章降其品秩文獻崩後始置貴人三員增嬪九員世婦二十七員御女八十一員貴人等關掌宮闈之務六尚以下皆分隸焉煬帝參詳典故製嘉名著之於今貴妃淑妃德妃為三夫人順儀順容順華修儀修容修華充儀充容充華為九嬪婕妤十二員美人才人十五員為世婦寶林二十員御女二十四員采女三十七員為女御總一百二十又有承衣刀人皆趨侍左右又增置

女官准尚書省以六局管二十四司葉適曰六尚六
司六典掌宮中之政此漢晉舊事也至煬帝置女官
准尚書省則出於創建內外分庭人臣不得分毫預
矣晉楊后以立惠基亂而天下為之分裂者數百年
隋獨孤后以立煬稔禍而編氓十喪八九詩首二南
有以也夫

九月大水

以本紀修

冬閏十月甲申詔修五禮

以本紀修

十二月

癸巳廢蜀王秀為庶人

以呂祖謙標目修

詔楊素三五日一入

省論大事

以通鑑修

交州俚帥反遣瓜州刺史劉方為行軍

總管平之

以通鑑修

隋高祖文皇帝仁壽三年秋九月壬戌置常平官

以本紀修

是歲龍門王通獻太平策罷歸教授於河汾之間

以舉要補

遺修

解題曰通字仲淹河汾人文帝徵之不至大業元年

一徵又不至乃續詩書正禮樂修元經讚易道朱熹

曰通見識高明說治體甚高特本領欠闕如古人明

德新民至善等處固未之講也

李遵曰文中子之言聖人之徒也傳之者

非其人為之癰創而已耳世謂房魏輩不稱師也未嘗以為師也蓋文中子教授河汾迹未甚顯沒後門人欲尊寵之故扳太宗時公卿以欺後世耳

突厥步迦可汗降於啓民可汗啓民歸磧石

以呂祖謙標目修

解題曰按元和郡縣志豐州東受降城北至磧口八百里中城至磧口五百里西城至磧口三百里磧口至回紇衙帳一千五里

隋高祖文皇帝仁壽四年春正月甲子帝幸仁壽宮

夏四月不豫秋七月命兵部尚書柳述黃門侍郎元巖召故太子勇太子廣囚述巖丁未弒帝乙卯即皇帝位殺勇八月丁卯喪還京師

以本紀及呂祖謙標目修

解題曰胡寅曰述巖親逢事會則當白帝併召楊素楊廣入閤質問陳夫人正其罪而廢廣出諸外熟論故太子可立則召之否則別命子孫之賢者素若不從降詔以軍法從事登時而宗社定矣乃出閤為詔出以示素反受制賊手俄頃之間福禍判焉述巖死

有餘辜矣事見通鑑

漢王諒起兵於晉陽以楊素為并州總管討之素執諒

以歸殺之

以本紀呂祖謙標目修

解題曰胡寅曰舉兵必有其名立事不可行詐隋文之崩當時中外頗有異論諒獨不聞耶偕曰未審而所被璽書不如高祖所約則可用此聲問晏駕不明之故以十九州附從之衆用王頌長駟之策既近京師則情實必彰天不共戴死生以之豈不忠孝兩得

乎而詭言為素反舉兵是詐也詐而無名是自為逆
也可乎事見通鑑

冬十月己卯葬文皇帝于太陵廟號高祖

以本紀馬
總通歷修

解題曰蘇轍曰昔者三代之君享國長久後世莫能
及然而亡國之暴未有如秦隋之速二世而亡者也
夫秦隋之亡其弊果安在哉自周失其政諸侯用事
而秦獨得山西之地不過千里韓魏壓其衝楚脅其
肩燕趙伺其北而齊掉其東秦人被甲持兵七世而

不得解寸攘尺取至始皇然後合而為一秦人見其
取天下若此其難也而以為不急持之則後世且復
割裂以為敵國是以銷名城殺豪傑鑄鋒鏑以絕天
下之望其所以備慮而固之者其密如此然而海內
愁苦無聊莫有不忍去之意是以陳勝項籍因民之
不服長呼起兵而山澤皆應由此觀之豈其重失天
下而防之太過之弊歟今夫隋文之世亦見天下之
久不定而重失其定也蓋自東晉以來劉聰石勒慕容

容符堅姚興赫連之徒紛紛而起者不可勝數至於
元氏并吞滅取畧已盡矣而南方未服元氏自分而
為周齊周并齊而授之隋隋文取梁滅陳而後天下
為一彼亦見天下之久不定也是以既得天下之衆
而恐其失之享天下之樂而懼其不久立於萬民之
上而常有猜防不安之心以為舉世之人皆有曩者
英雄割據之懷制為嚴法峻今以杜天下之變謀臣
舊將誅滅畧盡而獨死於楊素之手終於煬帝之際

天下大亂塗地而莫之救由此觀之則夫隋之所以
亡者無以異於秦也悲夫

除婦人及奴婢部曲之課令男子二十成丁

以通鑑修

十一

月乙未帝幸洛陽

以本紀修

丙申掘塹自龍門至臨清關度

河抵上洛

以本紀修

壬子陳叔寶卒贈長城煬公

以呂祖謙標目修

癸丑以洛陽為東京

以呂祖謙標目修

大事記續編卷四十七

欽定四庫全書

大事記續編卷四十八

明 王禕 撰

隋煬皇帝大業元年春正月壬辰朔改元

以本紀修

立妃蕭

氏為皇后

以本紀修

廢總管府

以呂祖謙標目修

丙申立晉王昭為

太子

以本紀修

二月己卯楊素為尚書令

以本紀修

詔天下公除

以通鑑修

三月營東京徙商賈數萬家以實之

以本紀修

營顯仁

宮

以本紀修

開通濟渠自河入淮自邗溝入江置離宮造龍

舟

以本紀修

解題曰按寰宇記開濟渠開封府開封縣南二里隋以汴水迂曲自大梁城西南鑿渠引汴水入號通濟

渠

鄭樵通志邦溝東北通射陽湖西北至末口入淮末口在今楚州山陽然此乃舊通江淮之道後以

湖道多風晉永和陳敏改由津湖興寧中又自湖之南沿東岸穿渠二十里入北口即末口也然猶有淮患至宋復穿今徑達盱眙廣陵志唐楊子縣在江都縣南十五里舊臨江故邦溝自楊子入江

夏四月將軍劉方破林邑

以呂祖謙標目修

五月築西苑

以通鑑修

解題曰按杜寶大業雜記苑內造山為海周十餘里水源數丈中有方丈蓬萊瀛洲諸山相去各三百步

山高出水百餘尺

秋七月丙午徙衛王集於邊

以本紀修

八月壬寅帝御龍舟

幸江都

以本紀及呂祖謙標目修

契丹寇營州遣通事謁者韋雲起

護突厥兵討之

以本紀修

是歲西突厥處羅可汗擊鐵勒鐵

勒叛之自立為莫何可汗

以呂祖謙標目修

隋煬皇帝大業二年春正月辛酉東京成

本紀

解題曰按洛誥周公將宅洛邑使召公先相宅乃卜

澗水東瀍水西所謂王城今宮城西唐苑內故城是

也周平王都之周公又卜瀍水東謂之成周今河南府東故洛陽城也周敬王居焉後漢魏晉隋初並都之煬帝始徙新都東去故城十八里唐以來皆都之元和郡縣志按華延雋洛陽記洛陽城東西七里南北九里城內宮殿臺觀府藏寺舍凡一萬一千二百一十九自劉曜入洛官署里閭鞠為茂草後魏孝文太和十七年幸洛陽定遷都而經營洛京煬帝嘗登邙山觀伊闕顧曰此非龍門耶自古何因不建都於

此蘇威對曰自古非不知以俟陛下帝大悅遂議都
馬詔楊素營之大業二年成徙都之其宮北據邛山
南直伊闕之口洛水貫都有河漢之象其宮室臺殿
皆宇文愷所創愷巧思絕倫製造頗窮奢麗前代都

邑莫之比焉餘見通鑑

大業記洛南九十六坊洛北三十坊大街小陌縱橫相對

丁卯併省州縣

以本紀修

二月丙戌作輿服儀衛

以本紀通鑑修

解題曰大業雜記輦路輿車並朱絲碧油網絡裝以
金玉填以雜寶珠璫紅翠極天下奇妙文物羽儀自

三代以降書記未有也

夏四月庚戌帝還東京

以本紀修

六月壬子楊素為司徒

以本

紀修

秋七月建進士科制百官不得計考增級

以通典本紀修

解題曰蕭子顯曰自宋謝靈運顏延年以文章彰於世謝莊袁淑又才藻繼之衣冠莫不仰其風流競為詩賦之事而五經文句無復通其義者朱熹曰進士更唐三百年以至國初大抵皆尚文辭事見通鑑

甲戌太子昭薨

以呂祖謙標目修

解題曰按大業雜記始太子與楊素同侍宴帝深忌素因宴寘毒太子及素並起二杯同至侍酒者誤進太子飲三日而毒發下血太子知之歎曰吾乃代楊素死乎命也數日而薨後素亦以毒薨餘見通鑑

乙亥楚景武公楊素薨

以本紀通鑑修

冬置洛口回洛倉

以呂祖謙

修標目

解題曰杜佑曰隋西京太倉東京含嘉倉洛口倉華州永豐倉陝州太原倉儲粟多者千萬石少者不減

數百石天下義倉又皆充滿京都及并州庫布帛各

數千萬亦魏晉以降之未有餘見通鑑

按元和郡縣志洛水東經

洛汭北對郎官渚入河渭之洛口亦名什谷張儀說秦王塞什谷之口即此也

集天下散樂

以呂祖謙標目修

解題曰按隋志有魚龍爛漫俳優侏儒山車巨象拔

井種瓜殺馬剥驢等奇怪異端百有餘物名為百戲

餘見通鑑

隋煬皇帝大業三年春正月突厥啓民可汗來朝

以通鑑修

丙子長星竟天

紀本

二月己丑彗星見

紀修本

三月辛亥帝

還西京

紀修本

殺故太子勇之子八人

標以呂祖謙修

夏四月

甲申頒新律

紀修本

解題曰牛弘劉炫修律今弘嘗從容問曰周禮士多

而府史少今令史百倍於前判官減則不濟其故何

也炫曰古人委任責成歲終考其殿最案不重校文

不繁悉府史之任掌要目而已今之文簿恒慮覆治

鍛鍊若其不密萬里追證百年舊按故諺云老吏抱

按死事繁政弊職此之由弘又問魏齊之時令史從容而已今則不遑寧舍其事何由炫曰齊氏立州不過數十府行臺遞相統領文字行下不過十條今州三百一也往者州唯置綱紀郡置守丞縣唯令而已其所具僚則長官自辟受詔赴任每州不過數十今大小之官悉由吏部纖芥之迹皆屬考功二也省官不如省事省事不如清心官事不省而望從容可得乎弘善其言而不能用胡寅曰炫之答弘是矣而

未盡也其不敢正言耶夫今史數多而不遑寧處者
良由隋文之治皆吏道也繁文有覆治之慮舊按有
追證之虞官盡屬銓曹事悉循條例則權必歸於今
史而簿書日多簿書既多則今史勢必加衆欲其簡
省從容何可得也然後知隋文勤勞旰食者大抵法
律文按而已此乃老胥吏用以困眩長官者而以人
主之重自弊精神其末流如弘所問固宜也

壬辰改州為郡

以本紀修

改上柱國以下官為大夫增省臺

寺監十六府廢伯子男爵

以本紀修史

丙申帝北巡六月戊

子次榆林郡丁酉突厥啓民可汗及公主皆來朝

以呂祖謙

修標目

解題曰榆林郡今勝州北距黃河五里

秋七月築長城

以呂祖謙標目修

解題曰發丁男百餘萬築長城西距榆林

勝州為榆林郡蘭州

河南有大小榆谷唐置榆林軍若自勝州至紫河太近此榆林蓋蘭州也

東至紫河

隋地里志

紫河在定襄郡大利東西相距千餘里定襄忻州也通典金河在榆林郡與紫塞河自馬邑善陽縣界流

八旬而罷死者十五六至明年秋又發丁男十餘

萬築長城自榆谷而東大業雜記長城北邊自崑崙

塞

肅州有崑崙山

以東有居延

甘州州丹有居延海路博德所築遮虜障也

五原

豐州或曰九原

雞鹿

水經注朔方郡渾窳縣北有路出雞鹿塞後漢竇憲耿秉出朔方雞鹿塞

高

闕

水經注河水出朔方郡窳渾縣故城東道逕高闕南史記趙武靈自代並陰山下至高闕為塞山下

有長城長城之際連山刺天其中斷兩岸雙闕自闕北至荒中闕口有城跨山結勢謂之高闕

漁

陽鴈門

代州

樓煩

嵐州

柳城

營州

西南又有龍

勃勒敦煌郡有漢龍

勒縣故地

總十塞並築城置鎮鎮兵五百人

通典靈州懷遠縣大業長

城在縣界河外
餘見通鑑

丙子殺太常卿高頴禮部尚書宇文弼光祿大夫賀若

弼免蘇威

以本紀呂祖謙標目修

八月帝歷雲中乙酉幸突厥啓

民可汗帳見高麗使者吏部侍郎裴矩請脅其王入朝

壬寅至太原營晉陽宮九月己巳還東京

以皇極經世呂祖謙標目

修冬以裴矩為黃門侍郎使通西域

以呂祖謙標目修

隋煬皇帝大業四年春正月己巳開永濟渠自河通涿

郡
以皇極經世修

解題曰御河之役王通聞之曰人力盡矣按列傳將

興遼東之役自洛口開渠達於涿郡以通運漕殿內

丞閻毗董其役

元和郡縣志魏武在淇水口為堰過淇水合入白渠以開運漕白溝水本

名白渠隋導為永濟渠自黎陽入澶州臨河縣西北東北入魏州界永濟渠南自汲郡引清淇二水入白

溝入魏州洹水魏館陶永濟縣開一百七十尺深二丈四尺入臨清縣漢武時河決館陶分為屯氏河東

北入海此渠蓋屯氏古瀆今自恩冀倉州乾寧軍東北入潮河合流縣東獨流入海西通於雄霸等州

水路

三月帝幸五原巡長城

本紀

夏四月營汾陽宮帝幸之

以本

修紀

解題曰按大業雜記勅於汾州北四十里臨汾水起汾陽宮即管涔山汾河所出之地在嵐州靜樂縣

秋七月辛巳築長城

以通鑑修

翊衛大將軍宇文述破吐谷

渾郡縣其地

以呂祖謙標目修

九月戊寅彗星見

以本紀修

冬十月

將軍薛世雄降伊吾城之

以呂祖謙標目修

隋煬皇帝大業五年春正月丙子改東京為東都

以本紀修

突厥啓民可汗來朝

以通鑑修

癸未詔均田

以本紀修

戊子帝西

還三月己巳自西京西狩夏五月擊吐谷渾六月壬子
至燕支山西域諸國來朝獻地癸丑置西海河源鄯善
且末等郡謫罪人戍之

解題曰燕支山即焉支山屬涼州天寶縣

唐楊炎燕支山神祠

碑西北巨鎮曰燕支本匈奴王庭昔漢武納渾邪置
武威張掖而山界二郡之間積高之勢四向千里

按隋書地理志西海古伏俟城吐谷渾國都河源古

赤水城鄯善古樓蘭城且末古且末城通典漢武帝

置西海郡在今酒泉郡

肅州

北千二百里又曰今西平

鄯州之西張掖甘州酒泉郡之北隋置西海且末河源

等郡

是時郡一百九十縣一千二百五十五戶八百九十萬

有竒隋氏之盛極於此矣

以本紀
通鑑修

解題曰杜佑曰後周靜帝有戶三百九十九萬九百六十四至平陳得戶五十萬及是纔十六七年直增四百八十萬七千九百三十二煬帝承其全盛遂肆荒淫登極之初即建洛邑每月役丁二百萬人導洛

至河及淮又引沁水達河北通涿郡築長城東西千餘里皆徵百萬餘人丁男不充以婦人兼役而死者大半及親征吐谷渾駐軍青海遇雨雪士卒死者十二三又三駕征遼皆興百餘萬衆餽運者倍之又逆徵數年之賦窮奢極侈舉天下之人十九為盜賊身喪國滅實自取之

秋九月癸未帝還西京冬十一月丙子幸東都

以本紀通鑑修

是歲民部侍郎裴蘊奏令貌閱戶口凡進丁二十四萬

三千新附口六十四萬有奇

以通鑑呂祖謙標目修

解題曰朱黼曰隋氏貌閱戶口至大業初富庶之盛
幾漢元始而裴蘊獻議猶以民間版籍脫漏戶口詐
增老小為言復令貌閱一人不實則官司解職糾得
一丁令代賦役於是進丁二十四萬有奇其以老癯
為丁壯廢疾為平人必矣唐世聚斂之臣多以括丁
為急務民益無聊可不監哉事見通鑑

擢蘊御史大夫與宇文述裴矩內史侍郎虞世基參掌

機密

以通鑑列傳呂祖謙標目修

突厥啓民可汗死子始畢可汗立

以呂祖謙標目修

殺司隸大夫薛道衡

以呂祖謙標目修

隋煬皇帝大業六年春正月丁丑以蕃酋畢集於端門

街盛陳百戲

以本紀修

遣將破流求

以本紀修

二月乙卯詔舊五

等爵非有功者除之

以本紀修

庚申以散樂配太常

以朱熹綱目修

三月癸亥帝幸江都宮以郡丞王世充領宮監

以呂祖謙標目

修冬十二月穿江南河

以呂祖謙標目修

解題曰陸游曰京口至錢塘梁陳以來不通漕至隋

始鑿渠八百里皆闊十丈

是歲始令從駕者戎衣著紫緋綠袍

以呂祖謙
標目修

隋煬皇帝大業七年春二月乙亥帝御龍舟入通濟渠

夏四月庚午至臨朔宮徵天下兵會涿郡伐高麗

以通鑑修

解題曰按唐志臨朔宮在幽州薊縣

秋山東河南大水

以本紀修

冬十月乙卯底柱崩擁河逆流

以本紀修裴矩誘西突厥酋射匱逐處羅可汗十二月處羅

來朝更號為曷娑那可汗常從巡幸

以呂祖謙
標目修

羣盜起

漳南竇建德舉兵

以呂祖謙
標目修

解題曰漳南屬今恩州歷亭縣

隋煬皇帝大業八年春正月壬午伐高麗兵發凡一百

十三萬人

以呂祖謙
標目修

三月圍遼東城弗克夏六月右翊

衛大將軍來護兒水軍敗於平壤城秋七月左翊衛大

將軍宇文述等潰於薩水癸卯帝班師九月庚寅至東

都冬十一月諸將除名

以本紀
通鑑修

解題曰平壤在安東府即漢遼東郡襄平城寰宇記

以為即漢樂浪郡王險城非也自慕容皝來伐後徙

國內城移都此城其地後漢時南北二千里至後魏

纔千餘里至隋東西六千里薩水去平壤城三十里

是歲大旱疫

紀以本修

前御史大夫張衡伏誅

以呂祖謙標目修

隋煬皇帝大業九年春正月丁丑徵天下兵募民為驍

果集涿郡

以本紀及呂祖謙標目修

己亥命刑部尚書衛文昇輔代

王侑守西京

以通鑑修

二月復宇文述等官爵

以本紀修

三月丁

丑城太興

以本紀修

戊寅帝伐高麗命吏部尚書樊子蓋輔

越王侗守東都

以通鑑修

齊郡丞張須陁擊羣盜破之

以呂祖謙

修標

目

夏四月庚午帝渡遼水遣宇文述等趣平壤

本紀通鑑

解題曰按水經寰宇記大遼水源出靺鞨西南山南流至安市入海小遼水出遼山西南入大遼水

六月乙巳禮部尚書楊玄感反於黎陽蒲山公李密說以策不從丙辰圍東都庚午帝班師遣宇文述等討玄感秋七月餘杭劉元進起兵應玄感壬辰玄感趣潼關八月敗死殺其黨三萬餘人

以本紀通鑑呂祖謙標目修

解題曰大業雜記樊子蓋既斬裴弘策達官子弟募
出征者並不敢入悉投玄感韓擒虎子世萼等十人
觀王子恭道虞世基子柔來護兒子淵裴蘊子爽鄭
善果子儼周羅暉子仲隱蘭達通子世直等二十餘
人或父從駕子入賊受玄感重任帝在遼東城下聞
事起曰玄感無帝王之量直欲亂朕天下耳又聞達
官兒郎皆入賊益憂懼計無所出冬十月勅大理卿
鄭善果御史大夫裴蘊刑部侍郎滑儀等還東都與

樊子蓋推繩玄感徒黨近遠連及殺三萬餘人枉死者大半僧尼道士及河南百姓被流徙者亦七八千人殘酷之甚致四方騷動寇賊蜂起國家空虛雖屢出兵不能制敵盧明月起淮南殺守令江都贊治王世充討平之王薄起青兗聚衆長白頻征不克歷山飛起河北四方結聚皆玄感之徒懼誅起而為賊餘見通鑑葉適曰煬帝篡弒之事楊素終始左右之而禍亂之端乃發於玄感所謂寡助之至親戚叛之大

抵天下將亂之時人物氣象自異如玄感李密皆功臣之子其少年意趣已自異常及人君失德政繁賦重人心已搖不計親疎遠近皆得乘間而起玄感入黎陽取帆布為牟甲政與勝廣挈干為旗相類勝廣玄感密皆不足以亂天下而天下之亂由之而生要之天下之勢不在瓦解而在土崩秦隋之亡皆土崩之勢也

又曰密為玄感畫三策邀天子歸路上策也八關中策也取東都下策也所謂上策獨可

通煬帝耳天下已亂安得遽定是不可用也八關之策玄感與密皆欲用而不可唐取而用之遂得天下

下策終於不可用
故玄感與密皆敗

閏九月帝幸博陵冬十月遣屯衛大將軍吐萬緒討元

進十二月王世充平之

以本紀通鑑及
呂祖謙標目修

解題曰博陵今博州章邱

是歲詔籍沒為盜者家

以呂祖謙
標目修

章邱杜伏威臨濟輔

公祐舉兵淮南

以呂祖謙
標目修

解題曰今濟南屬縣有臨濟鎮本漢朝陽縣

隋煬皇帝大業十年春二月戊子詔徵天下兵三月

壬子帝幸涿郡秋七月癸丑次懷遠鎮兵多不至甲子

高麗請降八月己巳帝班師冬十月丁卯還東都已丑

還西京

以本紀通鑑及
呂祖謙標目修

解題曰按新唐志營州有懷遠守捉

十一月祀南郊帝不齊于次

以呂祖謙
標目修

十二月帝幸東

都

以本
紀修

以張須陁為黜陟討捕大使

以列
傳修

隋煬皇帝大業十一年春正月增秘書省官百二十員

以本
紀修

二月庚午城郡縣亭塢

以通
鑑修

三月丁酉族誅驍衛

大將軍李渾將作監李敏

以本紀通鑑修

已酉帝幸太原夏四

月幸汾陽宮

以本紀修

以衛尉少卿唐公李淵為山西河東

撫慰大使

以通鑑修

秋八月乙丑帝北巡癸酉突厥始畢可

汗圍帝於鴈門帝下令重賞格停伐高麗募兵赴難九

月甲辰圍解冬十月壬戌帝還東都減賞格仍議伐高

麗

以本紀呂祖謙標目修

東海李子通據海陵

以呂祖謙標目修

城父朱

粲掠漢南

以呂祖謙標目修

解題曰城父亳州縣

隋煬皇帝大業十二年

楚帝林士弘太平元年春正

月作毗陵宮

以通鑑修

夏四月大業殿火

以通鑑修

五月丙戌日

有食之既

以本紀脩

納言薊威除名

以列傳脩

秋七月帝幸江都

命越王侗與光祿大夫段達太府卿元文都摠留後事

殺諫者建節尉任宗奉信郎崔民象王愛仁

以呂祖謙及通鑑標

目脩冬十月己丑許恭公宇文述卒以其子太僕少卿化

及為屯衛將軍

以呂祖謙標目脩

前東都法曹程讓為盜李密

歸之讓殺滎陽通守張須陁

以呂祖謙標目脩

十二月壬辰都

陽林士弘稱楚帝於豫章改元

以呂祖謙
標目脩

以驍衛將軍

唐公李淵為太原留守虎賁即將王威虎牙即將高君

雅副之

以呂祖謙
標目脩

太僕卿楊義以破降河北賊數十萬

虞世基奏罷其兵侍御史韋雲起劾世基裴蘊隱蔽盜

賊坐左遷

以呂祖謙
標目脩

賊將高開道起兵於燕

以呂祖謙
標目脩

虎賁即將羅藝起兵涿郡

以呂祖謙
標目脩

解題曰隋涿郡即幽州

隋煬皇帝大業十三年

隋恭皇帝隋義寧元年

楚林士弘太平二年

長樂王竇建德丁丑元年

梁帝梁師都永隆元年

梁王蕭銑鳴鳳元年

秦帝薛舉秦興元年

定揚可汗劉武周天興元年

魏公李密元年

梁王李執元年

春正月杜伏威據歷陽

以本紀通鑑脩

丙辰竇建德稱長樂王改

元

以本紀通鑑脩

辛巳兗州徐圓朗陷東平

以呂祖謙標目脩

二月壬午

朔方鷹揚郎將梁師都起兵連突厥

以呂祖謙標目脩

馬邑鷹揚

府校尉劉武周起兵附于突厥

以呂祖謙標目脩

虎賁郎將劉長

恭討李密兵敗密自稱魏公城洛口倉陷河南郡縣

以呂

祖謙標
目修

解題曰按元和郡志河南府鞏縣本與成皋中分洛水西則鞏東則成皋後魏併焉李密自潁川襲據鞏城斷洛川包南北山周三十餘里事見通鑑

三月劉武周取汾陽宮突厥立為定楊可汗武周即帝

位改元

以呂祖謙
標目修

解題曰楊隋姓也言能定隋也

梁師都稱梁帝改元引突厥居河南地

以呂祖謙
標目修

夏四

月癸未金城校尉薛舉自稱西秦霸王改元

以呂祖謙標目修

河南討捕大使裴仁基以虎牢降魏公密密據回洛倉

以通鑑及呂祖謙標目修

五月甲子唐公淵殺王威高君雅

以呂祖謙標目

修護軍柴孝和說魏公密密襲長安不從丁丑東都遣兵

擊密大破之密奔洛口

以通鑑及呂祖謙標目修

六月唐公淵舉兵

尊代王侑遣晉陽令劉文靜使突厥己丑淵子建成世

民拔西河郡癸巳建大將軍府以晉陽宮監裴寂為長

史劉文靜為司馬

以呂祖謙標目修

解題曰范祖禹曰匹夫欲自立於鄉黨猶不可不自重也況欲圖王業舉大事而可以不正啓之乎太宗陷罪於父而脅之以起兵高祖昵裴寂之邪受其宮女而不辭又稱臣於突厥倚以為助何以示後世乎夫創業之君其子孫則而象之如影響之應形聲尤不可不慎舉也是以唐世人主無正家之法戎狄多猾夏之禍蓋高祖以此始也按通鑑考異溫大雅創業起居注云命大郎二郎率衆討西河高祖太宗實

錄但云命太宗徇西河蓋史官沒建成之名耳唐殷

嶠傳從隱太子攻西河今從起居注餘見通鑑

西河今汾

州又按李璋晉陽事迹晉陽宮齊天保元年置周武

平廢大業三年又置在乾陽門直北

秋七月壬子遣江都通守王世充赴東都

以呂祖謙標目修

癸

丑唐公淵發晉陽代王侑遣虎牙郎將宋老生屯霍邑

武侯大將軍屈突通屯河東會積雨淵欲還世民諫止

之

以通鑑修

解題曰河中府唐為河東郡

武威鷹揚府司馬李軌起兵稱河西大涼王

以呂祖謙
標目修

薛舉稱帝

以呂祖謙
標目修

八月辛巳唐公淵敗宋老生斬之

拔霍邑

以呂祖謙
標目修

解題曰平陽有霍邑縣

以呂祖謙
標目修

癸巳劉文靜以突厥兵會唐公淵

以通鑑修

九月括江都婦

女配從兵

以本紀修

魏公密取黎陽倉

以呂祖謙
標目修

彗星見

以本

紀修

戊午唐公淵圍河東庚申濟河丙寅遣建成屯永豐

倉世民徇渭北淵女李氏從弟神通各起兵以應淵關
中羣盜皆降世民引隰城尉房玄齡為謀主冬十月辛

卯圍長安

以呂祖謙
標目修

解題曰竇苹音訓曰永豐倉在渭南倉之東太原倉
之西

丙申羅今蕭銑起兵巴陵稱梁王改元

以呂祖謙
標目修

解題曰按隋紀作羅新唐紀作羅山隋志巴陵郡有
羅縣舊唐志羅縣即古汨羅之地新志武德八年廢

入湘陰羅山自屬申州新紀蓋誤通鑑云羅川亦非也今從隋紀

王世充大敗魏公密於洛北既而敗於黑石

以通鑑修

解題曰黑石在河南府鞏縣

十一月丙辰唐公淵克長安約法十二條除隋苛禁下

馬邑郡丞李靖獄既而赦之

以呂祖謙標目修

解題曰按隋書新舊唐書紀傳高祖太宗實錄溫大雅創業起居注柳芳唐歷陳嶽唐統紀大業十二年

淵為太原留守時羣盜蜂起高祖子世民

本文作太宗後倣此

知隋祚已盡陰有安天下之志推財養士結納豪傑
咸得其歡心長孫順德劉弘基等皆因事亡命匿之
又與晉陽令劉文靜尤善文靜坐李密事繫獄世民
私入視之文靜喜挑言曰喪亂方劇非高光不能定
世民曰安知無其人哉今過此非兒女之情直欲共
大計宜籌其事文靜曰今李密圍洛邑主上流播淮
南賊盜以十萬數須真主取而用之則四海不足定

也今汾晉避盜者皆入此城文靜為令數年知其豪傑一朝號召立可數萬人尊公所領之兵復且數萬一言出口誰敢不從乘虛入關號今天下不盈年歲帝業可成世民笑曰卿言差合人意於是部署賓客陰圖起義欲白淵慮必不從欲竊發又恐驚淵沈吟久之淵領太原宮監而所善客裴寂為副監文靜謀因寂說引寂交於世民世民出私錢數百萬餉龍山令高斌廉與寂博陽不勝寂大喜日滋昵世民以情

告之許諾寂因選晉陽宮人私侍淵淵過寂飲酒酒
酣寂具以大事告之淵大驚寂曰正為宮人奉公事
發當誅為此爾未幾突厥寇馬邑淵令郡丞高君雅
與馬邑太守王仁恭并力拒之不利淵懼為煬帝所
譴甚憂之世民因進曰今主上無道百姓愁怨城門
之外皆已為賊若守小節必旦暮死亡若起義兵可
因機轉福天與不取憂之何益淵大驚曰何意敢發
此言吾將執汝告官世民復曰見天時人事如此所

以敢言必欲告執不敢辭死淵曰豈能告汝慎勿出口且去明日更來明日復進說曰此萬全之策以救滅族之事今盜賊遍天下大人受命討捕其可盡乎賊既不盡自當獲罪且又世傳李氏纂應圖錄李金才隆貴一朝族滅大人能平賊即有功當不賞以此求活莫可得淵意少解曰我一夜思汝言亦有大理今日破家滅身亦由汝化家為國亦由汝突厥數犯邊淵兵出無功帝遣使者執淵詣江都淵素被猜

忌及是大懼世民流涕曰奉事國家惟忠與孝今國
亂主昏盡忠何益傾家絕嗣非孝所宜事急矣須早
為大計又遣文靜及寂進說曰晉陽士馬精銳宮庫
豐饒以茲舉事可立大功關中天府代王沖幼首豪
並起未有適從願公引兵西誅暴除亂乃受單使囚
乎淵然之世民與文靜等議尅日舉事已而帝復馳
使者赦止淵其事遂已文靜謂寂曰先發制人後發
制於人唐公名載圖讖聞天下尚可帖帖以待禍哉

公為監以宮人侍客公死何憾奈何累唐公寂懼乃
勸起兵世民教文靜偽為詔發太原西河鴈門馬邑
男子年二十至五十悉為兵期歲盡集涿郡以伐遼
繇是人心愁擾益思亂會馬邑人劉武周殺王仁恭
舉兵反攻汾陽宮世民復曰大人受委鎮守而賊徒
竊據不能捍禦不早舉大計身陷禍機悔無所及淵
因集將佐謂之曰賊據汾陽宮我輩不能制自當族
滅將如之何王威高君雅及僚吏咸請集兵淵欲觀

威等之意曰朝廷出師皆稟詔勅今賊稱尊號近在數百里內江都懸隔若待奏報還期未測復將何計威等咸曰公地居賢戚務盡丹誠逡巡聽奏豈及事機淵曰善於是命世民與文靜長孫順德劉弘基等各募兵旬日間衆且一萬密遣使召子建成元吉於河東威君雅等見兵大集疑懼請禱雨晉祠

唐叔祠在大原

府平晉縣西南十二里

將為不利淵知其謀陰為之備五月甲

子旦淵與威君雅等同坐視事世民嚴兵在外以備

非常文靜導開陽府司馬劉政會入告變云二人謀反陰引突厥將覆太原淵陽驚曰豈有是耶徐以文書示之曰人告公反宜受勘當君雅詬曰反人欲殺我耳文靜叱左右執之丙寅突厥數萬騎寇城下淵令開門偃旗幟虜不測所為引兵掠城外而去淵令曰人告威君雅勾致此賊效矣遂殺之以起兵甲戌遣劉文靜連和於突厥六月己卯建成

本文作世子

與元

吉

本文作齊王

至自河東裴寂等請准伊尹放太甲霍光

廢昌邑故事尊煬帝為太上皇立代王以安隋室傳
檄郡縣淵曰如此所作可謂掩耳盜鈴事相逼不得
不爾甲申命建成世民將兵徇西河郡下之獲郡丞
高德儒數之曰卿見野鳥謬稱是鸞以諂時主義兵
之舉正欲誅佞人耳斬之餘皆慰撫盡復其業百姓
大悅癸巳開大將軍府置三軍以建成為隴西公左
領軍大都督左軍隸焉世民為燉煌公右領軍大都
督右軍隸焉元吉為姑臧公中軍隸焉裴寂為長史

劉文靜為司馬石艾長

縣屬太原郡

殷開山為掾劉政會

為屬長孫順德王長諧劉弘基竇琮為統軍開倉庫

賑窮乏遠近響應七月壬子淵杖白旗誓於野有兵

三萬以元吉為太原畱守癸丑發太原遣將張綸徇

稽胡離石

石州

龍泉

隰州

文城

西慈州

三郡隋將宋老生屯

霍邑

晉州縣

屈突通鎮河東議者憚之世民曰天實棄

隋老生之輩當如我何壬戌霖雨甚營于賈胡堡

在靈

石縣南三十五里

老生拒險師不得進已巳李密遣使致書

請合從淵覽書謂所司曰密誇誕宜卑辭以驕其志使不虞於我密得書甚悅議者以老生通相去不遙密姦謀難測突厥見利而行武周事胡者也太原一郡之會義兵家屬在焉愚夫所慮淵謀於衆世民曰武周突厥外雖相附內實相猜突厥必利太原寧肯近忘馬邑武周悉其此勢未必同謀京都畱守特畏義旗所以驍將精兵鱗次而進今若卻還諸軍恐動必有變生若突厥武周不謀同至老生屈突追奔競

來還無所入往無所之今禾菽被野人馬無憂李密
戀於倉粟未遑遠畧老生輕躁破之不疑本興大義
以救蒼生不顧煞身以安百姓當先入咸陽號今天

下雨罷進軍若不殺老生取霍邑敢以死謝

通鑑考異據溫

大雅創業起居注唐公顧謂大郎二郎曰何如對曰
云云太宗實錄盡以為太宗之策無建成名今從創
業注按創業注作於武德時建成位居上嗣太宗止
藩王爾所以每事大雅不使太宗獨專其名故併建
成言之也觀其諫高祖回師之辭洞究敵情
辭語明白建成庸人豈能及此今削其名

淵不納

促令引發世民將復諫會暝淵已寢世民不得入號

泣聲聞於內問其故曰今以義動進戰則尅退還則
兵散於前敵棄其後死亡須臾是以悲耳淵乃悟曰
兵馬已去如何世民曰右軍嚴而未發左軍去猶不
遠請自追之淵曰吾成敗在汝知復何言世民親與
建成分路追兵回八月己卯雨霽辛巳引師從傍山
細道趨霍邑淵曰老生若嬰城自守當即攻之主客
勢懸卒難致力建成世民曰老生勇而無謀以輕兵
挑之必當出戰戰必擒矣世民以數騎詣其城下舉

鞭指麾若將圍城者老生怒開門出兵淵曰兵疲未食且欲停營世民曰機不可失淵謂建成曰汝看兩陣將交引左軍趨東門命世民引右軍趨南門斷其歸路老生背城而陣淵與建成合陣於城東世民及柴紹陣於城南老生麾兵先薄淵建成墜馬老生乘之中軍左軍咸却世民與軍頭段志玄馳下堦坂衝斷其軍出其陣後手殺數十人刀盡缺血流入袖灑而復戰表裏齊譟響若崩山隋師大潰老生不得入

城棄馬投塹軍士斬首於麾下流血數里四面進薄其城時無攻具士卒緣稍攀堞無敢當者遂平霍邑撫其餘衆而用之丙戌下臨汾郡

晉州後改平陽縣

辛卯克

絳郡癸巳營於龍門縣河東戶曹任瓌請見淵曰吾此舉其濟乎瓌曰公仗順而起軍令嚴明所下城邑無秋毫之犯關中起兵者跂踵而待何不濟乎瓌在馮翊久悉其人情願入關宣布威靈以收左輔繇梁山

在韓城縣

濟河趣韓城逼邵陽徇朝邑

二縣皆屬同州

蕭造文

吏勢當自下次招諸賊然後鼓行據永豐

在華州華陰縣

積

粟雖未得京師關中固已定矣淵曰是吾心也與劉

文靜會於麾下淵謂文靜曰吾已及河突厥始至馬

多人少甚愜本懷已亥營於壺口

在慈州吉鄉縣西南五十里

通

絕津梁水濱居人競進舡舫前後數百乃置水軍壬

寅馮翊賊帥孫華土門

後為京兆府美原縣

賊帥白玄度具舟

於河以濟師淵命華及王長諧等引兵先渡以任瓌

為慰撫大使說下韓城九月乙卯張綸自離石下龍

泉文城等郡初王長諧之濟河也淵戒之曰屈突通相去五十餘里不敢與我爭鋒其勢可知但其懼罪必當伺便相襲宜為之備通果遣虎牙郎將桑顯和率精兵數千夜襲長諧義軍不利隋人逐北史大柰以游兵掩其後顯和敗績僅以身免丙辰馮翊太守蕭造降戊午淵率衆攻河東不克將吏勸領太尉加置僚屬從之通未下而三輔多歸者淵欲先取京師恐通恃其後裴寂曰不若破通而後趨京師世民曰

不然兵尚權權利於速今秉機度河以奪其心關中
羣賊處處屯結撫而有之何向不濟通自守賊耳何
能患我一失其機勝負未可知也淵兩從之華陰今
李孝常以永豐倉歸義以少牢祀河乃濟甲子次長

春宮

在同州朝邑縣梁載言
十道志周宇文護築

士庶至者日有萬數淵

禮之人人喜悅丙寅遣建成劉文靜王長諧屯永豐
倉以拒潼關世民率劉弘基長孫順德等數萬人往
高陵涇陽雲陽武功整屋鄠諸縣屈突通留鷹揚郎

將堯君素守蒲將自武關援長安至潼關阻文靜兵

不得進淵從父弟神通起兵於鄠柴氏婦淵女也亦

起兵於司竹

鳳翔府盩厔縣有司竹園

皆與世民會郿賊邱師利

李仲文盩厔賊何潘仁向善志宜君賊劉昊等各率

衆數千來降庚午淵觀永豐倉開倉大賑窮乏壬申

次馮翊

馮翊縣南三十二里有興德宮淵所次

乙亥世民屯阿城

阿房宮一

名阿城

建成自新豐趨霸上是日延安

延州

上郡郡廊州雕陰

綏州

郡並遣使來降丙子淵自下邳

華州縣

西上所經隋

宮苑悉罷之出宮女還其家十月辛巳至長樂宮時

京師畱守衛文昇陰世師挾代王以拒義師淵屯春

明門外

長安志外郭城東面三門中春明門

衆二十餘萬各依壁壘不

入村居無為侵暴遣使諭以匡復之意再三皆不報

辛卯世民帥師頓城西建成頓城東分朱雀大街連

營圍之甲辰圍城下今日犯隋七廟及宗室者罪三

族十一月丙辰軍頭雷紹吉先登京師平命主符郎

宋公弼收圖籍殺人劫盜背軍叛者死戊午以陰世

師黷貨郡丞骨儀苛酷並斬之連坐者十餘人淵擊突厥馬邑郡丞李靖察淵有四方之志因自鎖上變將詣江都至長安道塞不通而止淵已定京師將斬之靖呼曰公起兵為天下除暴亂以私怨殺誼士乎世民亦為請得釋癸亥率百僚備法駕尊代王為天子大赦改義寧元年十一月甲子淵自長樂宮入京師以淵為相國假黃鉞進封唐王此高祖平長安之本末也

王世充與魏公密戰于石子河敗績

以朱熹綱目修

解題曰石子河在河南府鞏縣

戊午魏公密殺翟讓

以呂祖謙標目修

壬戌唐公淵立代王侑

為皇帝改元義寧尊帝為太上皇

以呂祖謙標目修

解題曰朱熹曰漢高祖取天下正當為其直截做去

無委曲回護處隋大亂如此唐高祖太宗因羣盜之

起直截做去止是誅獨夫為其中不能無嫌又立恭

帝假援突厥回護委曲如此所以不及漢之創業也

事見通鑑

宋庠紀年通譜義寧取因義師之興而天下寧一也

甲子淵假黃鉞大都督內外軍事大丞相唐王已巳以

子建成為世子世民為秦公元吉為齊公

以呂祖謙標目修

榮

陽郡降李密

以通鑑修

十二月薛舉遣其子仁果圍扶風秦

公世民擊敗之

以本紀修

唐王淵以光祿大夫李孝恭為山

南招慰大使破朱粲降三十餘州

以唐紀呂祖謙標目修

屈突通

降唐王淵招河東通守堯君素不下

以通鑑及呂祖謙標目修

王世

充襲倉城魏公密大敗之

以通鑑修

唐王淵遣丞相司馬劉


文靜定新安以西雲陽令詹俊等下巴蜀

以呂祖謙
標目修

梁

王銑襲取豫章林士弘保餘干

以呂祖謙
標目修



大事記續編卷四十八